


UNSA NG BALAYA ANG PAGATUKORON NINYO KANAKO?

 Salamat, Igsoong Green. Usa kini ka pribilihiyo. Akong pagpangumosta para kang Igsoong lalaki ug Igsoong babayeng Green, ug sa tanan nga ania dinhi niining buntaga. Ug usa kini ka pribilihiyo nga gibati kong gihatag para kanako, nga makaanhi sa niining dapit nga pagasimbahan, aron mohimo og pipila ka mga pagpahibalo.

² Dili ko unta gustong kuhaon ang oras ni Igsoong lalaking Green dinhi, tungod kay nadungog ko na si Igsoong Green sa makadaghang higayon, nga nagwali, ug naimpluwensiyahan gayud ako, sa diha nga gihatud niya ang Pulong sa Ginoo nganhi kanato, ug mapainubsanon kaayo mahitungod niini. Kagahapon miingon siya, “Wala ko’y Pulong nga diretsong nagagikan sa Ginoo sama tingali nga nagaabot Kini pinaagi og kapadayagan, sama—sama sa kung ginaunsa pagpadala Niini, apan,” ingon pa, “Gusto ko lang nga—nga hatagan og punto ang kung unsay gikasulti na.” Ingon siya, “Sama kaniadtong misulat si Pablo og usa ka butang diha sa Biblia, mianhi ako aron hatagan lang og punto kung unsay gisulti na niya.” Ingon pa, “Wala man ko’y mensahe, ginahatagan ko lang og punto kung unsay gikasulti na sa Ginoo.” Karon pagkatalagsaon gayud niana, usa—usa ka batan—ong magwawali nga ingon niana, nga mosulti, magpahayag og ingon niana.

Karon dungan kita nga mag-ampo.

³ Minahal nga Dios, halos dili ko kabalo kung unsaon pagsugod, tungod kay nabati ko nga ania Ka karong adlawa, ug diha sa Imong Presensiya kanunay gyud namong bation nga pagka-gamay namo. Ug ginapasalamatan ko—ko Ikaw tungod niini nga pribilihiyo. Karon, Ginoo, ingon nga gihatag Mo kini nga dapit para kanamo, ginaampo namo nga tagboon Mo kami sa matag higayon nga magakatigum kami dinhi. Ug hinaut nga mamuhat ang Imong Gamhanang Espiritu sa niini nga siyudad! Hinaut nga maihatud namo kining Mensahe sa Maayong Balita nga gikahatag nganhi kanamo ug gitanyag nganhi sa among mga kamot sa niining kaulahiing mga adlaw, hinaut nga mamatuman Kini, ug angkonon Mo ang matag kalag sa Tucson ug sa mga palibot nga dapit niini, nga Imong gitagana-nangdaan ngadto sa Kinabuhi. Itugot kini nga mga butang, Amahan, sa Ngalan ni Jesus Cristo. Amen.

⁴ Siguro gusto ko una’ng mobasa og diyutay’ng bersekulo sa Kasulatan dinhi niining buntaga, sa dili pa nako isulti

kining mga pulong nga gusto kong isulti. Makita kini diha sa Mga Buhat, sa ika-7 nga kapitulo sa Basahon sa Mga Buhat. Ug samtang ginaabli ninyo kana, sugdan nato sa ika-44 nga bersekulo.

⁵ Karon mangadto kami sa Shreveport niining semanaha, niining moabot nga semana, para sa sunod-sunod nga mga panerbisyo, ug karon paningkamotan namo, kon itugot sa Ginoo. Si Igsoong Moore, Igsoong Jack Moore, usa ka suod kaayo nako nga higala ug ni Igsoong Pearry, ug gihigugma namo si Igsoong Jack. Ang Mensahe, sa hunahuna ko, medyo nagpalibog kaniya og diyutay, ilabina mahatungod sa pipila ka mga butang nga gimahal gyud nato ug gitoohan, nga—nga miabot Kini kanato tungod sa pag-abli sa Pito ka mga Selyo, sumala sa atong pagtoo Niini, sama sa, “binhi sa serpente,” ug ang “Eternal nga kasiguradohan sa mga magtotoo,” ug—ug uban pa, sa pipila nianang mga Mensahe. Nga, tingali’g para sa uban . . . Wala man ’ta naghunahuna nga malisud Kini, apan, Kini, kinahanglan mong ablihan ang imong kasingkasing para sa Kamatuoran. Nagatoo kita nga nagapuyo na kita sa—sa katapusang panahon. Tinuod kaayo kana para kanato, nga ania na gyud kita sa katapusan niining panaw.

⁶ Ug pag mamulong ka sa iglesia sa ubang tawo, bueno, gusto mong pasidunggan ang pagkamaabi-abihon niana nga tawo, sa—sa paghatag kanimo og ingon-niana nga kahigayonan nga makabisita sa iyang iglesia. Ug ako, sa tinuod lang, ingon nga nahibalo nga dili sila nagatoo Niana, ug ginatahud ko gihapon sila ingon nga . . . Daghan unta kong mahimong hisgotan dinha, walay labot sa paghatud Niana; gawas lang kon ang Balaang Espiritu na ang magduso Niini og diyutay, nakita n’yo, nan isulti ko gayud kung unsa ma’y Iyang gisulti. Ug wala na ko’y nahibaloan pa nga mas maayong buhaton kay sa pagbuhat niana, ug nagalaum ko nga wala na unta ko’y makat-onan pa nga mas maayong buhaton kay sa pagbuhat niana. Kita n’yo? Isulti nato Kini sumala gayud sa pagkasulti Niya Niini.

⁷ Karon mobasa kita og usa lang—usa ka bersekulo o duha dinhi sa—sa ika-7 nga kapitulo sa Basahon sa Mga Buhat, sugod sa ika-44 nga bersekulo.

Ang atong mga ginikanan may tabernaculo sa pagpamatuod didto sa kamingawan, ingon sa iyang gisugo, sa nagsulti siya kang Moises, nga pagabuhaton kini subay sa panig-ingnan nga iyang nakita.

Nga kini sa atong mga ginikanan sa ilang hingtungdan gidala kauban ni Josue sa diha nga ilang gipanag-iyang ang kayutaan sa mga Gentil, nga gihinginlan sa Dios sa atubangan sa atong mga ginikanan, hangtud sa mga adlaw ni David;

Nga nakakaplag sa grasya sa atubangan sa Dios, ug nangayo nga makakita siya og usa ka puloy-anan alang sa Dios ni Jacob.

Apan gipatukoran siya ni Salomon og usa ka balay.

Bisan pa niana ang labing Hataas wala magapuyo sa mga balay nga binuhat sa mga kamot; sumala sa giingon sa propeta,

Ang langit mao man ang akong trono, . . . ang yuta mao ang tumbanan sa akong mga tiil: unsang balaya ang pagatukoron ninyo kanako: nagaingon ang Ginoo: o kon unsa ang dapit nga pahulayan ko?

Wala ba pagabuhata sa akong mga kamot kining mga butanga?

⁸ Mahatungod Niini, sa pagbasa niini nga Kasulatan, gusto ko una'ng isulti ang pipila ka mga pulong nga buut kong isulti sa dili pa pagadalhon ni Igsoong Pearry ang mensahe niining buntaga.

⁹ Ginaisip ko kini nga usa sa maanindot nga mga higayon sa pagbisita ko sa Tucson. Mianhi ko dinhi tungod nga gipangunahan ako nga moanhi dinhi. Mianhi ako tungod nga ang Balaang Espiritu, pinaagi sa usa ka panan-awon, gipadala ako dinhi. Nasayod ko nga mora og katingalahan kini, siguro. Apan Siya, kutob sa nahibaloan ko, ug sa unsa mang butang nga nahibaloan ko gikan sa Dios, tungod kini sa usa ka panan-awon nga gipadala ako sa Tucson. Naghunahuna usab ko kung giunsa kaha ako pagpadala nganhi niining awaaw nga dapit. Ug dinhi kon diin adunay . . .

¹⁰ Sa espirituhanon nga pagkasulti, kini nga siyudad, wala na ko'y nahibaloan pa og unsa mang lugar nga ingon ka patay sa espirituhanon, kay sa siyudad sa Tucson. Adunay panag-away taliwala sa mga kaiglesiahan. Adunay mga panagbingkil taliwala sa mga kongregasyon. Wala gayu'y panagkahiusa, ug nag-inilogay ang matag usa, ug mangontrolar, ug mangpiut, ug maningkamot nga maangkon *kining* usa, ug mangabig. Usa na kini ka disyerto, sa espirituhanon nga pagkasulti, usab.

¹¹ Apan akong nabasa sa Biblia, kon diin gitawag sa Dios si Moises pahilayo sa iyang mga minahal sa kinabuhi ug sa tanan nga gimahal niya, ug gipadala siya ngadto sa kamingawan, aron isulat ang mga Kasugoan sa Biblia. Kana mao ang Daang Tugon, ang unang upat ka mga Basahon, Genesis, Levitico, ug Deuteronomio, Exodo. Siya . . . Wala ko lang nasunod-sunod ang mga niini, apan kana ang upat ka Basahon. Sa tinuod lang mao gyud kana ang Daang Tugon. Tungod kay, ang tanang uban pa Niini mao man ang gisulti sa mga propeta, diha sa Mga Salmo ni David, ug uban pa, gawas sa Mga Cronicas sa mga hari. Apan kadto ang maoy mga pundamental sa Daang Tugon. Si Moises ang nagsulat niini human nga gitawag siya gikan sa iyang yutang

natawhan, kon diin siya gipanganak ug gipadaku sa taliwala sa iyang mga kabanay, ug gipadala siya ngadto sa kamingawan, aron isulat kini nga Basahon sa Daang Tugon.

¹² Dayon nahibaloan ko usab nga diha sa Basahon sa Bag-ong Tugon, kon diin si Pablo, nga mao ang magbubuhathat, o dili diay ang magbubuhathat, kondili mao ang tagsulat sa Bag-ong Tugon. Gipahilayo usab siya gikan sa iyang mga kabanay, ug, tungod sa Espiritu, padulong ngadto sa Arabia, kon diin migahin siya og tulo ka tuig ug tunga, aron makakaplag og pagdihog. Ug si Pablo usab mao ang pangulong tagsulat sa Bag-ong Tugon. Karon, atua man si Mateo, Marcos, Lucas, ug si Juan, apan sila'y mga escriba lamang nga misulat sa kung unsay gisulti ni Jesus sa kaniadtong nag-uban-uban pa sila Kaniya. Ug, apan, basaha gani ninyo ang maong Basahon hangtud sa Timoteo, ug hangtud sa Mga Taga-Roma, ug hangtud pa sa Mga Hebreohanon, ug uban pa, nadawat ni Pablo ang dihog aron maisulat ang Bag-ong Tugon; gigamit niya ang tibuok Daang Tugon ingon nga usa ka landong, ug gipahimutang kini diha sa kahan-ayan. Ug gipasidunggan kini sa Dios, ug gihimo kini nga mao ang Bag-ong Tugon.

¹³ Ug karon kung kinahanglan nga mapahilayo ang Daang Tugon gikan sa...kung kinahanglan nga mapahilayo ang maong tagsulat gikan sa iyang mga kabanay, ngadto sa kamingawan, para makaangkon og inspirasyon aron maisulat ang Daang Tugon. Ug sa Bag-ong Tugon usab, gipahilayo usab sa Magbubuhathat ang manunulat niini, ngadto sa usa ka dapit nga awaaw, para makaangkon og inspirasyon aron maisulat ang Bag-ong Tugon. Ug ang maong mga Basahon selyado kini og Pito ka mga Selyo; nagatoo ko, nga magkinahanglan usab kini sa mao gihapong butang, sa niining mga adlaw, aron maablihan kanang Pito ka mga Selyo. Kanang biyaan mo ang imong mga gimahal, ang mga gihatagan mo og bili, ug ang gamay'ng balay nga gihatag kanako sa mga tawo, ug ang tibuok kong pamilya ug mga higala, ug ang usa ka iglesia nga nagalambo na, ug walay nakulang; ug ang—ang biyaan kana, basta-basta na lang kini biyaan, ug mopahilayo, paingon ngadto sa usa ka disyerto kon diin wala ka'y bisan kinsa man nga kaila, ug ang tanan batok pa kanimo.

¹⁴ Apan aduna gayu'y butang sa Dios, nga ginatulod Niya ang usa ka tawo nga buhaton ang mga butang nga lagpas na sa unsa mang kaugalingong panghunahuna niini, aron nga mamahimo kining para sa kahimayaan ug kadungganan sa Dios. Ug gibati ko kana, dili ingon nga ginapasidunggan ang akong kaugalingon, kondili gibati ko—ko kini ingon nga usa ka pribilihiyo nga biyaan ang tanan-tanan nga gimahal ko, aron nga makadangat dinhi niini nga kamingawan ug antuson ang wala ko pa naantus sukad-sukad sa akong kinabuhi, dinhi niini nga kamingawan, o sa niini nga disyerto. Apan nagatoo ako, nga

sa pagbuhat ko niana ug sa pagtuman sa kung unsay gisugo sa Dios nga pagabuhaton, giablihan sa Dios para kanato ang mga tinago niining kaulahiing adlaw. Ug ania kita dinhi uban niini nga Mensahe.

¹⁵ Karon, daghang mga tawo ang miuban kanako, ug dili na kana ikatingala. Kasagaran sa usa ka tawo nga atong... Naghinigugmaay man ang mga tawo sa usa'g usa, ug kining, gugma, ang maoy mopahimo kanimo og mga butang nga wala nimo damha nga imong mabuhat. Ug daghan kaninyo ang ningbiya sa inyong mga panimalay, gibiyaan ninyo ang tanan, aron lang nga makaadto, makaanhi niining maong disyerto.

¹⁶ Daghan ang nanawag kanako, daghan ang nangutana kanako, “Moadto ba 'mi sa Arizona? Maayo kaha kana nga para kanamo?” Bueno, sumala sa gikasulti na mahitungod kang Moises ug kanila nga mga tawo, dili kini mao ang lugar sa mga prutas, dili kini lugar sa mga granadang-prutas.

¹⁷ Dinhi man gud wala kaayo'y panginabuhian, ug mahal pa gyud ang palaliton, ug mahal ang kantidad sa mga palaliton. Usa kini ka malisud kaayong puy-an nga lugar, ang Tucson, Arizona; gamay ra ang pagpasuweldo, ug—ug mahal ang kantidad sa mga pagkaon, ug ang abang usab. Kini'y—kini'y malisud gyud puy-an nga lugar, kon sa ingon-niana nga paagi. Apan maayo kini puy-an, og mala ang klima. Ug kita usahay... Dili gayud nato ipahiangay ang atong mga hunahuna ngadto sa mga butang niining kalibutana.

¹⁸ Kinahanglan nga ang tan-awon nato mao ang pagpanguna sa Balaang Espiritu. Apan may usa ka butang ang nagpalibog kanako sa pag-anhi ko dinhi, ug kung sultihan ba ang mga tawo, “Bueno, dili n'yo na kinahanglan moadto,” o “Kinahanglan ninyong moadto,” depende na lang kana sa matag usa, depende na sa pagpanguna sa Dios sa maong tawo kung unsay iyang buhaton. Sa hunahuna ko nga ingon-niana unta ang buhaton sa matag usa kanato, ang mapangunahan sa Espiritu, kung unsay buhaton.

¹⁹ Ug daghan kaninyo ang ania dinhi nga gikan pa sa Jeffersonville, ug sa kongregasyon didto, ug mianhi gyud mo dinhi. Karon, ang butang lang nga nagpabalaka kanako, mao ang dapit nga pagasimbahan.

²⁰ Ug akong nahunahunaan, samtang ginabasa ko ang Kasulatan dinhi, mahatungod kang Esteban ug sa iyang pakigpulong kaniadto sa wala pa ang iyang kamatayon; kay gibato man dayon nila siya pagkahuman, tungod sa iyang mensahe. Samtang namulong siya, ingon siya, “ang atong mga ginikanan,” naghigot siya bahin sa mga Hebreohanon sa unang mga panahon, kon giunsa nila pagpaninguha nga makakaplag og kahimuut sa atubangan sa Dios, aron magtukod og usa ka dapit nga pagasimbahan. Miingon siya nga, “Gipatukoran Siya

ni Salomon og usa ka balay, o usa ka bilding.” Nahibalo na kita sa maong sugilanon.

²¹ Apan gusto ko ang sunod niya nga mga pulong, “Bisan pa niana ang labing Hataas wala nagapuyo sa mga balay nga binuhat sa mga kamot.” Sa usa pa ka bahin dinha sa Isaias, ingon siya, “Giandaman Mo Ako og usa ka lawas; kita n’yo, ang halad ug mga gasa, ug mga bilding, ug uban pa, apan giandaman Mo Ako og usa ka lawas.” Bueno, nahibaloan nato nga naghisgot diay siya kaniadto mahatungod sa lawas kon diin nagtabernakulo ang Dios, diha kang Cristo.

²² Apan nagatoo ko karon, nga ang inspirasyon nga miabot kang—kang Igsoong Green, nga mobalhin na dinhi, siya ug si Igsoong babayeng Green, gibiyaaan nila ang ilang balay didto sa sidlakan, usab, aron . . . didto sa Texas, aron moanhi dinhi nga . . . aron magsugod na usab gikan sa uno; tungod lamang sa usa ka inspirasyon, nga gibati nila nga kinahanglan nilang buhaton ang ingon-niini. Ginadayeg ko ang mga kalalaken-an nga nagasunod sa pagpanguna ni Cristo, bisan unsa pa ang bayad niini kanila.

²³ Bisan pa nga ang tibuok kalibutan, tingali’g ang pinakasuod mong mga higala, maghunahuna nga sayup ka, apan dili kini sayup para kanimo. Basta lang nga mabati mong aduna gyu’y butang nga nagapaluyo niini, nga ang Dios kini nga nagapamuhat diha kanimo; dili gayud kini sayup, ug kanunay gyud kining magmalampuson.

²⁴ Ngani makita ninyo kining batan-on nga magtiayon, usa ka gigasahan nga batan-ong lalaki. Wala ko kini ginasulti tungod kay ania siya nagalingkod dinhi. Ug kining batan-ong babaye usab uban sa iyang mga bata, uban sa iyang pamilya nga pagaamumahon, ug ang bana nga miundang na sa iyang trabaho ug tanan na, aron mobalhin lang dinhi.

²⁵ Nasinati ko usab kana mga tuig na ang milabay niadtong gitawag ako para sa ministerio. Dili ako nagmalampuson nga pastor, tungod nga aduna man ko’y latagaw, laagan nga espiritu. Dili ko makapabilin sa bisan asa. Basta kung asa magapanguna ang Espiritu, kinahanglan kong mouban Niini, tungod aduna ko’y Mensahe. Miingon si Jesus, “Kinahanglan Kong magwali sa ubang lungsod usab.”

²⁶ Apan aduna man pu’y mga magbalantay nga nagabantay og panon sa mga karnero. Mapasalamaton gayud ako nga gisunod ni Igsoong Peary ang pagpanguna sa Balaang Espiritu, ug mao nga karon aduna kita’y usa ka tabernakulo. Gamay ra kini. Pero igo na kini para sa pagsugod, nga makita ang Balaang Espiritu nga . . . Wala man kita nasayod, basta hinay-hinay lang ’ta nga mamuhat. Karon, nagatoo ako, nga kung nakigsulti ang Dios kang Igsoong lalaki ug Igsoong babayeng Green, nga moanhi dinhi, ug nagbukas og usa ka dapit diin ang atong

mga anak; imbis nga nagasakay-sakay ra sa ilang mga bisikleta pagka-Dominggo sa buntag, ug diha sa mga kadalanan nga nagalibot-libot lang, aduna hinoon sila'y dapit nga pagaadtoan para sa pagsimba, imbis nga nagalingkod-lingkod lang kita ug nagapaminaw sa kung unsay mapaminawan sa radyo, nga okey ra man gihapon.

27 Apan kita, ingon nga usa ka pundok sa mga tawo, aduna man kita'y Mensahe alang niini nga adlaw. Kita, nagatoo kita nga gihatagan 'ta sa Dios ug usa ka Mensahe. Ug si Igsoong Green, mao ang, dili ko gustong tawgon siya nga akong katabang, tungod kay kami. . . Bueno, siya man, usab, akong kauban, magkauban kami niini nga Mensahe. Ginawali usab ni Igsoong Green ang mao rang butang ug Mensahe nga akong ginatooan. Gibiyaan niya ang iyang panimalay, gibiyaan niya ang iyang pamilya, gibiyaan niya ang iyang iglesia. Gani siya'y, nagatoo ko, nga usa siya ka superintendente sa distrito o ingon-niana, sa usa sa mga organisasyon, ug gitalikdan niya ang tanan-tanan sa diha nga nadungog niya Kini. Gibiyaan niya ang tanan-tanan nga iyang gimahal, usab, aron moanhi niining disyerto, aron lang suportahan ang gikahatag sa Dios kanato karon.

28 Ginasulti ko og nagatoo ko nga dili lang kinahanglan nga maanaa kini sa atong mga kasingkasing, katungdanan gayud nato nga suportahan siya, sa tanan nga mahimo nato, nga motabong sa mga panerbisyo, nga moanhi dinhi aron sa pagsimba, ug aron himoon kining usa ka dapit kon diin mahimong ipadayag sa Dios kanato ang mga butang nga kinahanglan Niyang ipadayag kanato. Ug sumala sa iyang giingon, "Wala nagaabot kanako ang Mensahe pinaagi og pagdihog, ingon nga nagaabot kini sa ingon-nianang paagi ngadto sa uban kanato siguro, apan," ingon siya, "Ania ako aron suportahan lang kung unsa ma'y gihatag na sa Dios." Pagkaanindot nga pahayag! Ug nagatoo ko, nga kung makigtimbayayong kitang tanan, maipahimutang gyud nato ang atong mga kasingkasing ngadto niini.

29 Nasayod ko nga ang matag usa kaninyo, kung mabati ninyo ang sama sa akong gibati, nagahinam-hinam gayud kong makita ang Espiritu sa Dios nga mamuhat, nga dili na ko halos makahulat pa niini. Pipila ka mga kasinatian nga akong nasinati didto sa bukid, ang mabati kana pag-usab, ang ingon-anang Butang nga mahimayaon kaayo sa akong kasingkasing kaniadtong naluwas ako! Ug mahimo kitang moadto sa usa ka dapit, manglingkod ug makita nato kini sa atong taliwala, nga nagakauga na kita. Sa dihang ania kami sa disyerto, makapakighinabi sa akong mga kaigsoonan, ginaestorya ko nila ug ginaestorya ko usab sila; kanunay, sa gamay'ng pamaagi sa pagbantay, nga masusi mo pinaagi sa Espiritu, sama sa kung unsa kini sa una pa, kanang mahibaloan ang kahimtang nianang igsoon, og makita kung unsay problema. Hinayhinay

kong mabati nga kaming tanan nagakaluya, hinayhinay na nga nagapahilayo sa Espiritu. Nahimo na kining usa ka ordinaryong butang para kanato. Kinahanglan natong mosimba diha sa Espiritu, kon diin ang Espiritu sa Dios. . . Dili nga ang atong Mensahe lamang ang mamahimong kalayo alang niining panahona, kinahanglan nga mamahimo usab kining kalayo sa atong mga kasingkasing. Kita n'yo? Kinahanglan nga maanaa gyud kini sa atong mga kasingkasing, o kung dili man dili nato—dili gihapon nato maipresentar Kini sa husto ngadto sa mga tawo. Kinahanglan daladala gyud sa Espiritu ang Mensahe, Mismo. Ug nagasalig ug nagatoo ako sa matag usa kaninyo, nga mamahimong mga Cristohanon gayud.

³⁰ Karon nagkinahanglan sila og mga magtutudlo para sa Sunday school. Nagkinahanglan sila og kawani. Ug gusto kong isulti kini aron nga masabtan ninyo og ayo. Ako kining iglesia.

³¹ Tulo na ka tuig ako nagaanhi. Ug aduna kaniadto og usa ra ka pultahan ang gibuksan para kanako, si Igsoong Mack kadto nga naghangyo kanako nga moanhi og mowali. Panalanginan siya sa Dios. Wala na'y uban pa nga midapit kanako; dili man nga ako'y batok kanila, maayo man sila. Si Igsoong Brock, usa ka buutan kong higala, si Igsoong Gilmore pud, og daghan sa niining mga kaigsoonang Pentecostal dinhi, nga grabe, ka suod ko kaayo nga mga higala. Gihigugma ko sila; wala gyud ko'y unsa man nga batok kanila. Nasabtan ko ang ilang kahimtang. Dili man gud ko nila puedeng dapiton dinha, ug pagkahuman makapabilin pa sa gihapon sila sa ilang organisasyon. Kita n'yo, dili nila mabuhat kana. Tungod kay, kung buhaton man nila, mapalagpot gyud sila. Mao nga masabtan mo na lang ang ilang kahimtang. Naagian ko usab kaniadto ang mao gihapong butang. Apan, oh, hinaut nga ingon niini gyud unta sa kanunay, "Unaha ninyo pagpangita ang Gingharian sa Dios," ang kabubut-on sa Dios.

³² Ug karon nga, si Igsoong Green, ingon nga gipadala siya sa Dios dinhi ug nagbukas siya kanato og usa ka iglesia sa samang hamili nga Pagtoo nga ginatooan nato, angay lang nga magpasalamat gayud kita sa Dios, ug motambong sa matag panerbisyo, tumanon ang matag katungdanan nga mahimo nato. Ug kung hangyoon man ugaling kita nga mobuhat og usa ka butang, nga mag-ampo, mangita, mohimo, magmahimo kitang mga sundalo dinha nga. . . andam mismo nga buhaton kini. Kita n'yo?

³³ Ipapabilin n'yo ang Mensahe nga madungganon, ikinabuhi n'yo ang husto nga matang sa kinabuhi. Ayaw tugoti nga dunay unsa mang hugaw nga motaput Niini. Nagapuyo kita sa kaulahian na kaayo karon. Kita—ania na kita sa ulahi na kaayo nga takna. Ikinabuhi nato Kini nga putli. Bueno, ang kinabuhi ko, ang inyong kinabuhi, ang tibuok natong kinabuhi kinahanglan nga limpyo gayud, atubangan sa Dios.

³⁴ Ang atong mga kabatan-onan nagabagdoy-bagdoy lang, gikan sa usa ka lugar ngadto sa usa ka lugar, gikan sa usa ka sinehan ngadto sa usa ka sinehan, ug nagapahilayo ug nagapahilayo gikan sa Dios. Husto. Karon, mao kana ang tinuod. Nakita ko kana sa akong mga anak, ug nakita ko usab ang akong kaugalingon nga nagakadangat na sa punto diin walay. . . Inyong, kinahanglan natong tipunon ang atong mga kaugalingon, aron sa pagsimba sa Dios; ingon-niana ang giingon sa Biblia, “Pagmakita nato nga nagakahiduol na kini nga adlaw, labi pa gayud kita nga magakatigum.” Kung adunay duha lamang ka tawo dinhi, siguradohang usa gyud ka niining duha. Karon kana’y. . . Ug kung magakatigum kita ug magkauban nga nagasimba, kung ingon-niana kita gayu’y, duna gyu’y sa kung unsang butang niana, miingon si Jesus, “Diin gani ang duha o tulo nga magakatigum sa Akong Ngalan, anaa Ako sa ilang taliwala.”

³⁵ Karon, sama sa gisulti ko kaganina, giingnan ako ni Igsoong Green, ug gisulti niya kini. Miduol ang akong asawa, og giingnan pud ko kung unsay giingon ni Igsoong Green kaniadtong wala ko dinhi. Ingon niini, ug giingon na usab ni Igsoong Green niining buntaga, “Bukas ang pulpito bisan unsa mang orasa.” Karon pirmi man. . . Kanang, bukas kono kini para kanako aron magwali.

³⁶ Karon, sa kasagaran, kinahanglan ko pang mobiyahe hangtud ngadto sa Jeffersonville, Indiana, aron ihatag ang Mensahe nga gikahatag sa Dios kanako, aron ihatud kini ngadto sa mga tawo; mobiyahe hangtud sa Jeffersonville, Indiana, ug ang matag usa kaninyo nga nagabiyaha usab latas sa nasud, ug maningkamot makakonekta sa mga linya sa telepono ug tanan na, aron nga makapatalinghug sa Mensahe, tungod kay mao man kini ang atong gikinabuhian. Kita n’yo, mao kana’y hinungdan nga ania kita dinhi. Bueno, dili na nato kinahanglang buhaton ang ingon-niana.

³⁷ Ingon nga gihatagan ako sa Dios og Mensahe, makaanhi ako mismo niining pulpito ug iwali kini, ug gawasnon nga mahimo kini. Oo. Ug nagatoo ko, nga pinaagi niana, pagapanalanginan kamo sa Dios nga Makagagahum-sa-tanan kung suportahan lang ninyo kini nga iglesia karon, kamo nga pundok sa mga tawo. Dili lamang kana, kondili mangsangyaw kita ug tan-awon kung mahimo ba natong mapatambong ang uban. Kita n’yo, makigestorya kita ngadto sa uban bisan asa, pahibaloon sila bahin sa atong iglesia ug kung unsa ang katuyoan niini. Kung unsa nga ang atong iglesia. . . Mao nga ania kita. Gusto namo nga manganhi kamo, nga may dala og mga bag-ohan, ug sigurado ko nga maayo gyud kini para kanatong tanan. Kita n’yo? Aduna ta’y bilding, nga ginapasamalatan nato. Mapasalamaton gyud kita tungod niining lugar, nga matiguman.

³⁸ Apan, “Bisan pa niana ang labing Hataas wala man nagapuyo sa mga balay nga binuhat sa mga kamot, kita n’yo, ‘Kay ang Langit mao man ang Akong trono, ug ang yuta mao ang tumbanan sa Akong mga tiil; ug asa man ang dapit nga Akong pahulayan? Apan giandaman Mo Ako og usa ka Lawas.’”

³⁹ Ug usa man kita ka Lawas ni Cristo. Busa sa diha nga nagabalhin kita gikan sa usa ka bilding ngadto sa usa na pud ka bilding, nagatoo ko, diha sa pagdala sa atong mga Mensahe, ug sa pagpangadto nato ug sa pagpahigayon og mga panerbisyo sa pagpang-ayo. Ug unsa man ang ipadayag sa Ginoo kanato nga pagabuhaton, buhaton nato kana dinhi mismo sa iglesia, hangtud nga modaku kini nga modaku nga kinahanglan na natong ipahigayon kini sa ubang lugar, ug sa kung asa pa man, hangtud nga moabot si Jesus. Panalanginan kamo sa Dios.

⁴⁰ [Nagasulti si Igsoong Green, ug dayon gihangyo niya si Igsoong Branham nga ordenahan siya. Blangko nga bahin sa teyp—Ed.]

Iduko nato ang atong mga ulo.

⁴¹ Minahal nga Dios, sa dihang nagatindog kami dinhi niini nga entablado, nga nagarepresentar, dinhi niining altar mismo, naamgo namo nga kami’y usa—usa ka kaliwat nga naghimalatyon na, sumala sa kahimtang sa yuta. Sa pagtan-aw namo dinha sa mga kalsada ug makita namo ang kasal-asan nga napatik na bisan asa, ug agpas nga nagakawala ang Himaya sa Ginoo. Ug nasayod kami, nga pagmokayab na ang Himaya sa Ginoo, magakayab usab ang Iglesia uban Niini. Dios, gusto namong makauban niana.

⁴² Pipila pa lang ka adlaw ang milabay, nagatindog ako didto sa kanto sa dalan, sa tabok mismo sa maong dalan, sa pagtan-aw ko niadtong parada nga nagalabay; ug makita ko kadtong karaang mga tangke sa Nahaunang Giyera nga nagauna sa maong parada, dayon misunod ang daku kaayong Sherman nga mga tangke, sa luyo niadto lahi-lahi na ang mga nagsunod, dayon ang mga inahang gold-star na; ang makaluluoy’ng nagkaguol nga mga pamilya, may nagahilak nga asawa, ug usa ka gamay’ng nagkagidlay nga batang lalaki nga nawad-an og papa, usa ka tigulang inahan nga nawad-an og anak. Nakahunahuna ko, “Pagkasubo gayud,” nga nagatindog didto sa kanto sa dalan ug ginatan-aw ang ingon niadto nga mga nagalabay. Dayon namatikdan ko, sa paglabay na nila niini nga bilding, nausab ang musika ngadto sa *Onward, Christian Soldiers*. Nagamartsa sila, nga nagasunod; apan sa paglabay na nila niini nga bahin!

⁴³ Minahal nga Dios, ginahunahuna ko ang usa na usab ka halandong panahon nga moabot, ug kini mao ang pagkabanhaw, sa diha nga unang manungha ang kaniadtong, mga balaan, og mga patriarca. “Kay kita nga mga buhi ug nanghibilin

dili magauna o magapugong kanila nga nangamatay; kay ang trumpeta sa Dios patingugon, ug ang mga nangamatay diha kang Cristo mouna sa pagpamangon.” Dayon pagmakita na namo kanang halangdon... nga nagakayab na ang mga tawo, nagamartsa paitaas ngadto sa kawanangan; ug magatindog kami didto, nga nanaghulat sa amo pud pagkausab, ingon nga nanghibalo na nga kami’y magasunod ra, usab. Dios, himoa kaming matinud-anon nga mga sundalo.

⁴⁴ Kadto lang gayud ang mga nakauban ug mga nakaapil sa giyera ang nasayod kung unsa ang tinuod nga kahulogan niana, ang makita kadtong mga tangke nga nagalabay. Ug, Dios, nahunahuna namo nga kadto lamang usab ang mga nakaapil sa gubat sa kinabuhi ang nasayod kung unsay pasabot niana, sa diha nga magahulat na kami sa among turno nga maipahimutang na sa among puwesto, diha sa pagkabanhaw, aron mokayab.

⁴⁵ Ug kining, akong batan-on pang igsoon, nga ania nagatindog, binansay, andam na, og nakabisti, nga nagahulat alang sa usa ka tigulang nga tawo aron pandongan siya og mga kamot, usa ka tigulang nga beterano nga gikan na didto sa unahan sa panggubatan, nasayod usab siya nga kinahanglan niyang moapil sa gubat, usab. Minahal nga Dios, ginapandong ko kining dili-takus nga mga kamot nganha sa akong igsoon, sa pagrepresentar sa Imong mga kamot. Panalangini si Igsoong Green, minahal nga Dios, nga akong ginapanalanginan sa Ngalan ni Jesus. Hinaut nga dalhon niya kini nga Mensahe, Ginoo, ngadto niining siyudad ug ngadto sa asa Mo man siya tawgon. Hinaut nga magmaunongon siya, puno sa Espiritu, nga nagakinabuhi sa kinabuhi nga dili-masalawayon. Dios, tugoti siya nga maangkon ang mga kasingkasing sa mga tawo, aron nga matudloan niya sila ug magiyahan sila ug matultolan sila sa dalan nga ginatinguha namong tanan nga pagalakwan. Itugot kini, Ginoo.

⁴⁶ Panalangini ang matinud-anon niyang asawa, ang iyang gagmay’ng mga anak. Panalangini ang among tanang mga pagpaningkamot, ingon nga Cristohanong mga igsoon dinhi sa yuta, aron nga madala namo kining Maayong Balita ngadto sa kinatumyan sa kalibutan. Ipadala ang Imong Espiritu diha kaniya, Dios. Nagaampo kami sa Ngalan ni Jesus Cristo, sa diha nga ginahalad namo siya nganha Kanimo. Amen.

Panalanginan ka sa Dios, Igsoong Pearry. Dalha ang Pulong sa Dios!



UNSANG BALAYA ANG PAGATUKORON NINYO KANAKO? CEB65-1121
(What House Will You Build Me?)

Kining Mensahe ni Igsoong William Marrion Branham, unang giwali sa Ingles niadtong Domingo sa buntag, Nobyembre 21, 1965, didto sa Tucson Tabernacle sa Tucson, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org